

修訂日期: 2004/10/08 發行日期: 2006/2/1

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 2, No. 115

原始資料: 蕭鎮國大德提供◆張文明大德二校, 維習安大德提供, 北美某大德提供

No. 115 [No. 99(924), No. 100(149)]

佛說馬有八態譬人經(出雜阿含別譯)

後漢西域三藏支曜譯

聞如是。一時佛在舍衛國行在祇樹給孤獨園。多比丘僧俱。佛告諸比丘。馬有弊惡態八。何等八。一態者解羈韁時便掣車欲走。二態者駕車跳[跳-兆+梁]欲嚙人。三態者便舉前兩脚掣車走。四態者便躡車輪。五態者使人立持軛摩抄車却行。六態者便傍行邪走。七態者便掣車馳走。得濁泥抵止住不復行。八態者懸筯餒之熟視不肯食。其主牽去欲駕之。遽哈噲噬欲食不能得食。佛言。人亦有弊惡態八。何等為八。一態者聞說經便走不欲聽。如馬解羈韁掣車走時。二態者聞說經意不解不知語所趣向。便瞋跳[跳-兆+梁]不欲聞。如馬駕車時跳[跳-兆+梁]欲嚙人時。三態者聞說經便逆不受。如馬舉前兩脚掣車走時四態者聞說經便罵。如馬躡車輪時五態者聞說經。便起去如馬人。立持軛摩抄車却行時。六態者聞說經不肯聽[卑*頁]頭邪視耳語。如馬傍行邪走時。七態者聞說經便欲窮難。問之不能相應答。便死抵妄語。如馬得濁泥便止不復行時。八態者聞說經不肯聽。反念姪泐多求不欲聽受。死入惡道時。乃遽欲學問行道。亦不能復得行道。如馬懸筯餒之熟視不肯食。其主牽去欲駕之。乃遽哈噲噬亦不得食。佛言。我說馬八態。惡人亦有八惡態如是。諸比丘聞經歡喜。作禮而去。

佛說馬有八態譬人經